

Brifing NATO-a u Sarajevu

# Uknjiženje vojne imovine je test koji BiH mora položiti

Ne očekuje se napredak dok ne bude formirana vlast

Sjevernoatlantski savez sebi ne može dopustiti da za članicu prihvati zemlju koja ne može postići unutrašnji konsenzus o uknjiženju vojne imovine, kazao je jučer na brifingu za novinare Rohan Maksvel (Maxwell), šef Vojno-političkog savjetodavnog odjela Štaba NATO-a u Sarajevu.

- Razlog zbog kojeg je baš taj uvjet postavljen BiH za ulazak u NATO jeste to što smo

htjeli vidjeti može li ova država donijeti korektnu odluku i riješiti jedno vrlo osjetljivo pitanje. Mi želimo da postanete dio naše alijanse, ali prije toga morate riješiti i problem s viškom oružja. Zbog tih problema samo pet posto budžeta odlazi na obučavanje vojnika, ali činjenica da su mnogi vojnici otišli u Afganistan govori dobro o uspjesima vaše zemlje - dodao je Maksvel.

Brifingu su prisustvovali i norveški ambasador Jan Bratu (Braathu), kao i Odžak Vefahan (Ocak), ambasador Turske, koja je postala nova kontakt ambasada NATO-a za pitanja BiH.

- Uvjete i kriterije NATO-a ispunili su Slovenija, Hrvatska, pa čak i Albanija. BiH ne smije biti izuzetak, i to neće biti sudeći prema brzini kojom je došla do MAP-a. Pitanje vojne imovine obično je tehničko pitanje koje je nepotrebno dobilo političke konotacije. Mi ne očekujemo nikakav napredak u vezi s tim dok se ne formira vlast, ali kada to bude učinjeno, ovaj test morate proći. Tako ćete pokazati da obećanja nisu bila samo prazne riječi - izjavio je Bratu. S. Ša.



S brifinga u Sarajevu

(Foto: B. Nirić)